

四庫全書

史部

欽定四庫全書

赤城志卷二十二

宋 陳耆卿 撰

山水門四

山

仙居

括蒼山在縣東南五十里高一千五百丈周回三百里
羣山中取號巉絕有八向焉一向凝真宮其七則
臨海黃巖仙居永嘉樂清縉雲東陽七縣界皆山

春綿接今縣西蒼嶺亦其所通也按寰宇記云括
蒼山在州西四十里今臨海真隱山本號括蒼而
天台之東亦有蒼山蓋一山而綿亘三邑云

韋羌山在縣西四十里絕險不可升按臨海記云此衆
山之最高者上有石壁刊字如科斗晉義熙中周
廷尉為郡造飛梯以蠟模之然莫識其義俗傳夏
帝踐歷故刻此石其後守阮錄携吏民往觀雲雨
晦冥累日不見而旋舊有綠筠庵

按舊志載運羌
山亦名天姥或

又曰緯鄉俗語訛也然高僧傳載曇蘭憩赤城事
則曰韋鄉山在樂安縣陶弘景玉匱則曰括蒼西
南一百餘里有偉美山登真隱訣則又曰偉羗山
多神異之事然則韋鄉一山而六者之名不同未
詳孰是陳襄題云去年曾覽偉羗圖云有仙人
古篆書千尺石巖無路到不知科斗字何如盤
盪英氣四紆餘定有神仙此地居天子正求伊與
呂如何不見起耕漁天鞠精靈久貯儲中間豪
傑出無虛鄉民世世家居此爭使兒孫不讀書
峭壁回環幾百區其間巖石可耕鋤如何得片山
如此白首相將老母居古意噴岬與世疎一官
羈絆可歸歟此山未及西山好下有仙人結草廬
四友之賢世莫如白頭終作一鄉居此山不惜
將錢買歎惜無因共結廬郭三益題綠筠庵詩
云道人棲碧山雲居在空曲十年海潮音利物緣
已熟更尋妙高頂超然具幽築古木棹空青寒筠

抱巖綠時携貝葉書步入深林讀雲影冷蕭條靜
對含烟玉客來境非喧客去境自足宵眠護禪虎
晝引銜花鹿庵中三昧語藥我食
嗔毒何當晚雙鳬藜杖追高躅

福應山在縣東二里陰陽家謂其居邑龍首得地之勝

居人建浮圖其上自是取青紫不乏焉上有盡美

亭其下枕溪巖壑俱秀

張景脩記云仙居邑之美者也而一山盡焉福應山

之美者也而一亭盡焉盡美亭者非盡一山之謂盡一邑之謂也朝奉大夫龐公倅台之二年季按屬邑輒環七百餘里可謂勞矣然至於仙居福應則徘徊四覽嘯咏終日欣然忘其歸信乎美哉一日謂景脩曰昔朱超石云登北邙遠眺則衆美都盡予於此山見之矣山距城二里崢嶸獨秀浮圖

居其上而亭居浮圖之南予名之曰盡美矣子為
予記之景脩曰唯唯雖然公之意豈有窮耶不遺
一景一物兼收而並采猶東西之不可相無也邑
之括蒼章甫紫籜韋羗皆峯巒險絕巖洞環恠而
溪流森然烟雲晦冥鷗鷺出沒平波漁唱斷隴樵
歸有騷人畫史不能工也夫豈易名哉邑令劉君
襲明雅為公知國序以告於是又知福應山者皇
祐間令樞密直學士陳公述古名之也陳公賢先
生勸學文垂於世踰四十年公實作是亭公賢宰
相子人門冠代不驕富貴而意乃在乎山水之間
愚將見其美不專於竹石花木風晴雨雪之際而
在乎學者之材也噫美於是盡矣又題云南亭不
減北邙高美景因公見一朝已看溪山如在畫更
傳風雅似聞韶栽桃定有仙家住種竹寧無隱者
招秀氣當為多士福未應都放與漁樵楊密題
云清風送月上欄干雲雨溪流破玉寒我有三峯

高興在漫堂聊作畫屏看
醉後愁生任數奇僧
胞借夢入新詩覺來著意尋桃李除了春風總不
知

安洲山在縣東南五里舊名管山又名九旬上有潭按
舊志唐武德中僧灌頂講經於此時漁者甚衆頂
勸止之忽一夕風雨旦視之則為洲矣故更今名

又按羅題刑適灌頂行業記云師卜居安洲以波
瀾四絕人迹不通乃誓曰若使此地坦夷來此講
經未決旬白沙湧出地平如砥乃講金光法華
二經以答嘉貺此與舊志語微異今兩存之

放光塔山

一名綠
山

在縣北二里峯巒綺錯秀迤可愛上

有浮圖蓋周顯德六年僧德韶所創與福應山興

道院塔列為三二溪駛其下陰陽家曰浮牌形云

孟大武詩云綠仞氣浮三塔聳浮牌聲
振兩溪寒人以為能狀一邑之嘉致

紫籜山在縣北三十里舊名竹山與天台接唐天寶中

明皇夢一人紫服而朝自稱竹山神來呈瑞鳳翌

日果有鳳翔焉遂改今名今其側有瑞峯又上有

棲鳳亭

王戩詩云竹山絕頂古招提景異相將竺
國齊靈鷲雄吞台嶽小瑞峯高壓斗牛低

雲深石恠宜僧隱水靜林幽樂鳥啼記得當年封
紫籜只因丹鳳此中棲錢杲詩云雲鎖藤蘿石路

深旃檀林裏有叢林萬山重疊雨添翠一水灣環
風淥金午飯欲陪龍象住夜眠要聽鳳凰吟更求
竹罽安禪處老
却平生名利心

峽山在縣東南一十五里下即純熙觀按呂寶琛記云

衆峯拱揖列岫迂迴遼展畫屏高褰翠幄谿澗隱

映致侔川峽故名峽山觀此秀槩可想也

餘見純熙觀

張阜山

舊經作張父

在縣西二十五里自州而西至常風望

之山歸然東瞰縣治譙樓南環以溪北則有嶼及
柘溪源等處其泉谷深秀舊傳逸民張阜居焉

水簾山在縣西南四十里與永嘉接其中崖壁橫峙有

瀑自顛瀉宛若簾垂四時不竭

昔人留題有今古長垂地晨昏不上

鈎之

巖下有石室殊廣可容三十人

萬竹山在縣西南四十五里絕頂曰新羅九峯回環道

極險隘嶺上見叢薄敷秀平曠幽窈自成一村薛

左丞昂詩所謂萬竹源中數百家重重流水遶桑

麻是也

薛又有記

浮石山在縣南三里南峯山南下有巨石屹溪中視之

若浮動故名

漁潭山在縣東南七里下瞰溪潭居人嘗漁於此故名
孟溪山在縣北一十里與彭溪等山接東北界天台西
北連婺女其中丘谷深窈且多茂林樵採者日往
焉

青尖山在縣北一十里雄据邑後若擁障然其中一峯
極峻而尖又以遠而長青故名

石龕山在縣東一十五里上有石室深三丈廣踰一丈

俗傳神靈棲馬

石瓏崆山在縣西南一十五里上多巨石玲瓏可愛似

仙都諸山云

靈山在縣西二十里淨梵院上按舊志以禽鳥不棲故

名

項羽山在玉几山東三十五里相傳項羽少時駐馬於

此有石馬跡尚存

彭溪山在縣西北四十里與孟溪及天台界接其間林

木可十頃五穀雜貨略具民樂居之

馮師山在縣西二百一十里與括蒼嶺接舊傳馮氏女

學道於此故名

枕溪山在縣東南九里以其瀕大溪故名

白巖山在縣西南一十五里以其有白巖故名

三井山在縣北三十里以有三龍湫故名

桐林山在縣南五十里居人以造楮為業焉

枕海山在縣西六十五里以其趾插海故名

赤城山在縣西七十里以其山土石皆赤色故名

曹官山在縣西八十里一名曹潭

石疊山在縣南三十里

玉几山在縣西五十里

南峯在縣南三里俗以一峯南立故名其巔四面軒舒

山水環擁為邑人遊覽之最有題詠甚盛

令劉光詩云百

尺擎空窄堵波羣峯杳此獨高何鼓鐘鳴處是非
外天地望中蒼翠多間看墅雲披玉柱醉眠秋浪
捲銀河問師乞取窓前
月一榻清風許我麼

雲峯在縣西二十五里以雲出小洞故名

瑞峯在縣北三十里

麻姑巖在縣西南二十五里一名仙姑巨石谿谿矯如

人立昔麻姑訪王方平蔡經嘗隱於此故以名巖

其上有洞旁兩石相峙高深各踰丈俗呼風門有

麻姑像存焉

葉發詩云恠石倚空碧傳有神仙迹
元放古來遊孝先應曾歷山前無斷

碑往事杳難覓麻姑
去不來青鳥無消息

太翁巖在縣東四十里玉几山東太翁者不知何許人

相傳國初居此山高無水卓錫得甘泉遇旱不枯
宣和中多避寇於此

景星巖在縣西五十里萬仞壁立高處見井邑如錯綺
繡僧行機嘗縛茅以居今為尼庵上有鹿頸巖以
其形似之而名長數丈坦曠可步左右崖壁更峻
絕云

滌水巖在縣西南十五里水自層崖飛瀉薄如水簾狀
陽公巖在縣西北三里北有洞高廣如屋三楹

珠頭巖在縣南七里

赤城巖在縣西六十里

護民巖在縣南六十里

蒼嶺在縣西北九十里高五千丈周回八十里與縉雲

界接重崗複徑隨勢高下其險峭峻絕為東澗之

最行者病焉

唐劉昭禹詩云盡日行方半諸山直下看白雲隨步起危逕極天盤瀑頂

橋形小溪邊店影寒往來空太息元髮改非難

東嶺在縣東一里與臨海界接上有旋憇亭令趙幼聞

以山坳多晚風故為此以障之

馬蹤嶺在縣北一十里與永康東陽界接多草徑崎嶇

云

界嶺在縣東三十里以與臨海界接故名

十丈嶺一名小峽嶺在縣南五里

嶺在縣闕北五里

江家嶺在縣南七里

界嶺在縣南一十里

北嶼嶺在縣西北一十里

闕嶺在縣南二十里

石姥嶺在縣東二十五里

括蒼洞在縣東南三十里括蒼山之間按塵外記括蒼

成德隱元之天蓋第十洞天列仙所居在台之樂

安即仙居舊邑也又寶藏名山記云括蒼洞周回

三百里徐真人所治真人名來勒嘗得道上昇至

東漢為太極法師蒞職洞天總司水旱罪福之籍

唐天寶七年有慶雲覆洞太史奏有真氣見於台宿詔建洞宮榜曰成德隱元舊傳此洞與處之玉虛宮通自括蒼嶺而言東則屬台西則屬處是謂天門地戶故不特處名括蒼而台之括蒼門與此邑之括蒼驛亦皆是得名焉寶曆中道士葉藏質重修之國朝天禧二年投金龍白壁賜額凝真宮崇寧二年令蘇教奏聞封靈應真人光宗在儲宮書瓊章寶藏四字鎮之金上龍潛亦賜奎畫及金

鑄星官像由是洞宮增重矣洞口有石雲其山曰

福星山道士馬自善所手培云

雲笈七籤云羊惜以夾江尉罷歸隱

括蒼山一日與道士飲忽仆而寤云有一人自稱靈英邀入洞中須臾石間迸出一物指曰此青靈芝也食之仙情所食甚美自是惟飲水覺身輕骨鳴時兄忻任樂安令每往省之朝去暮還後入委羽山人莫之見令劉光詩云古洞藏真不記年翠崖蒼壁故依然昨來一夜清無夢身在仙家第十天

寧海

蓋蒼山在縣東北九十里一名茶山瀕大海絕頂睇諸

島淑紛若綦布以其地產茶故名上有水簾側有
觀音巖舊傳大士自海上至隱於此其中一罅透
頂每日光注射見玉瓶青鉢焉東又有巖刻真逸
二字按真逸乃陶弘景道號昔往來寧海從張少
霞遊今焦山風濤間有瘞鶴銘自題華陽真逸又
顧况嘗寓臨海亦以此自號未詳孰是山上有火
燭巖赤色閃爍欲動有仙人綦局及石船在其上
焉

桐栢山在縣西四十里連天台山按神邕山圖云桐栢在天台極東寧海界上父老又傳梁王山即古桐栢昔未建寺時葛元嘗居之初元鍊丹寧和山中為鬼物竊去遂徙此後隱天台故寧海天台皆有桐栢焉今梁王山下尚有桐栢里旁復有仙人里且多葛姓蓋元之苗裔云

天門山在縣北六十里按漢地理志會稽鄞縣東南有天門水入於海陶弘景真誥亦云天門山在鄞縣

之南寧海之北山半亞海今柵墟鐵塲正其處蓋
從嵎剡金庭發足繚繞三百里至此謂之天門者
言其高也

王愛山在縣西六十里與天台分界唐咸通中剡寇裘

甫據寧海殺其令陳仲翁懿宗遣王式發兵收之

戰於海口

縣北五十里

上礪

縣西北七十里

海游三處甫遂從

此山遁去今父老猶能言之

通鑑作黃罕嶺誤矣

硤石門山在縣西北五十里兩峯夾起矗立千仞俗傳

神人欲以剡為海夜驅陰兵舁巨石系於山趾如
堰埭之狀功未竟比曉而止今有巨人跡丈餘崖
上石刻恠竒不可讀

梁王山在縣西二十五里舊傳梁太清末侯景作亂陳
霸先兵起有一王子避地於此史失其名後人但

稱梁王因以名山或以為梁宣帝營也

詳見梁
宣帝廟

大中山在縣北一十里其岡四斷昔有僧卓庵其上掘
古塚得磚馬上刻大中二字遂以名山大中唐宣

宗年號也或以為山當縣之正中云

三十六雷山在縣西三十里自松壇至西溪新田沿棧道而上峰巒纍纍如貫珠凡三十有六折葛元鍊丹處也面北通馬塢三坑

龍鬚山在縣西北五十里其岡四斷恠石屹立產銅鐵及苓杞等靈藥有龍湫三四世傳鬼神出沒其間云

靈鳳山在縣南七十里宋元嘉中有梅長者休官隱於

此誦蓮華經忽有鳳裴回庭下如諦聽之狀歲餘方去長者死遂以名山

白巖山在縣東一百里其左一峯筆立山圍繞如屏旁有赤白巖輔其下形肖石鼓又梅林及永樂山鄉亦有白巖山與此為三

卧龍山在縣東南一里一名應家山以其岡勢蜿蜒如龍偃卧更今名舊有鶴林庵

白嶠山在縣東五里下有嶺焉晉武帝初置縣於此今

或於沙磧中得斷甃云

石臺山在縣東六里數石屹立遙望如臺故名有昔人登高題名經野燒漫不可讀

塔山在縣西南三十里狀類馬鞍以其上兩塔對峙故名舊有一庵今併塔亡之矣

鴈蒼山在縣北三十里西南連桐栢上有石如鴈齒且色蒼故名上有石牕

鳳凰臺山在縣西四十里一名石臺盤其上有石方濶

十丈有巨人跡焉

柯仙山在縣西四十里舊傳僧曇猷棄槎入天台駐錫於此故名其地產牡丹特盛

赤搗山在縣北五十里東跨鄞江西連鴈蒼山北抵奉化

獅子山在縣南九十里絕頂有巨人跡長一尺五寸入石一寸世傳為仙跡云

屈母山在縣南九十里即龍母山舊傳屈氏母子徙居

此其母死且葬焉

仙巖山在縣南一百里以絕頂二石如仙人偶坐故名
有石洞地多奇草靈藥云

龍姥山在縣東南一百二十里視衆山最高世傳有龍
姥隱迹於此故名

三門山在縣東二百五十里海中以三峯如門鼎立故
名

蛇盤山在縣東海中四圍有水相顧盤屈如兩蛇故名

蓋台明二州分岐於此

石鼻山在縣東南一十里以其中有石如鼻故名

南田山在縣東海中上有平疇可三十頃

石佛山在縣東海中以其狀若佛故名

杜鵑山在縣東一十里

赤柱山在縣北三十里

橫塘山在縣南五十里

黃珠山在縣東二百里海中

蒲田山在縣東二百里海

青珠山在縣東海中

帽尖峯在縣北二十里以山形如帽故名旱歲或有微雲覆之翌日必雨上有龍湫

天女峯在縣北四十里望之凝然如新髻女狀故俗名了髻上有小庵凡無子者禱焉往往多得女海中人云每厯台境望餘山皆伏唯天台華頂與此峯卓然屹立云

鹿頭峯在縣西一百里與天台接舊傳人有登其巔者
西望林壑中所隱隱七八家冬有花如桃李訪
其處則無之

石笋峯在縣東南一百二十里聯臨海仙巖洞

瀛巖在縣東二十五里崖壑險絕下蘸海中上有小亭

石壁刻瀛巖二字令高襲明所書

梁間有一詩云
溫台萬丘壑走

通成重脰佳山落床頭咫尺反不知我聞野老說
山乃神所移蓬萊本三峯一峯今失之上千雲霓
秀下壓鰲背欹夜半見海日紫暈開咸池魑魅著
老木狴鼠向人啼危亭無遺棟絕壁無舊題夫子

勇過我疎身敢獨躋我病不能從夢寐常追隨秋
風海上來霜清鱸正肥行尋越溪畔息此塵外機

東郭巖在縣南一百里秀石峩嶺匯為一壑陰風襲體

夏無暑氣石間生菴菹蒲水梔東西瀕海多薑

木

嶼湖巖在縣南一百里巔岼玲瓏參空秀起外環以水

如盆中所貯菴蒲石然

壽星巖在縣西南一百二十里一名老人以山如老人

狀故名山旁皆盧姓俗傳冢墓對此巖者其子孫

必壽故更今名

闔鷄巖在縣北三十里以兩巒對峙如闔鷄狀故名

園佛巖在縣北四十里高崖中有石窟深丈餘無徑俗

傳日西照時望其中若佛然故名

帳設巖在縣北四十里以其綿延數里如幕帟故名

千丈巖在縣東南二里

香巖在縣西北五十里

摘星嶺在縣南二十五里舊名新嶺宣和中廉訪使劉

長卿自北至以其山高峻更今名

盧駁元題云自知牛關耳不柰

晚俟何客鬢愁中老秋山別後多扁舟桃葉渡夜雨竹枝歌賴有臯盧監時堪戰睡魔左綿詩云已知星可摘須信路皆通日影穿雲薄天形入水空遙看梁苑雪獨揖楚臺風指點中華地山河萬

國雄

楓槎嶺在縣南一十五里舊傳僧曇猷自海至棄槎於

此故名

桐巖嶺在縣西南一百二十里舊路由狼坑縣渚海游

靖康後軍書警急遂取道於此民至今便之

石姥巖嶺在縣南九十里一名寧和以上有石姥神故名

大龍嶺在縣西南一百里回旋折曲凡三十五盤

武嶺在縣西北三里

寺嶺在縣西五里

白沙嶺在縣西一十里

牌嶺在縣東北二十里

古鷺嶺在縣西二十里

梅枝嶺在縣東南二十里

相見嶺在縣西南二十里

盧西嶺在縣西北二十里

筋竹嶺在縣南二十五里

許家嶺在縣北三十里

西溪嶺在縣北三十里

紫溪嶺在縣西南四十里

柴溪嶺在縣西北四十里

西倉嶺在縣東北五十里

桑州嶺在縣西五十里

漚洋嶺在縣東北五十里

吳洋嶺在縣北六十里

黃公嶺在縣西六十里

柵墟嶺在縣北六十里

海游嶺在縣北六十里

東倉嶺在縣東北六十里

眺頭嶺在縣南六十里

石戶嶺在縣北七十里

杉嶺在縣北八十里

紫溪洞在縣西北四十里地幽阻僅線路唐寶應元年

袁晁據浙東河南副元帥李光弼擊斬之晁弟瑛
從五百騎遁入洞中光弼駐兵洞口絕其糧道其
徒竟餓死今巖石中多得刀劍鼎鏑云

危橋在縣南一百里兩石峙立所謂石門門間六尺不

通車馬以小木橋跨道從石門入自木橋下行轉上木橋始接石橋所謂俛橋長幾三尋背如劒脊下有湍泉橋旁有石門門間八尺自此下嶺西一石峯撐空特立名石柱峯石上點白如梅花片又名梅花巖東石洞深二丈橫廣倍之兩旁壁立仰若承塵中有泉穿洞而出前後兩石門皆蝙蝠棲宿南冷泉竇窪僅置杯味甚甘隨酌隨滿循東石門旁行一峯削成數仞頂上一碁局方廣丈餘夜

分或有雲氣輒聞碁聲西石門即聖潭潭石明淨
如拭盡日續蔓深不可窮潭有蛇能乘風飛行近
歲有樵者入山聞霹靂聲就視則潭旁巨石直裂
如劈中有青泥流出掬之成石好事者取之掌痕
猶在石崖高絕螭房層生今去海十里不知何時
物也

浮門在縣南一百九十里土多陳姓蓋六朝時霸先之
後隋滅陳盡室避亂於此歷唐五代以貲雄其家

磚甃皆湖州物人取以為砥瀕海產乳柑

紹興十五年漁

人於海上獲一琴視其腹題云臣雷某造縣以獻於朝高宗見之淚下乃建炎時渡海所失物也

丹丘在縣南九十里葛元鍊丹處孫綽賦所謂仍羽人於丹丘尋不死之福庭是也

閩風臺在縣北五十里天門山西麓拔起數千仞旁有香巖石井釣臺洎竹岡

馬跡石在縣西七十里靈公山中以其如馬足紛蹂之狀故名

石屏風在縣西四十里蒼崖壁立足浸潭瀨中巖腹有
棧道陟降者謂若入蜀云

石棺在縣北四十里兩山夾峙如門中有一石如棺狀
故名

石鏡在縣北八十里西張山上

風穴在縣西四十里海游嶺下舊傳僧曇猷暑行至此
以鐵錫拄杖卓石取風故名今其蹟尚存

赤城志卷二十二

欽定四庫全書

史部

赤城志卷二十三至

詳校官監察御史_臣沈孫璉

檢討_臣德生覆勘

總校官檢討_臣何思鈞

校對官中書_臣高中

謄錄監生_臣陳秉寧

欽定四庫全書

赤城志卷二十三

宋 陳耆卿 撰

山水門五

水

自昔稱山明水秀二者不可得兼也而兼之者勝焉山
猶精神水猶血脉無精神則鑠無血脉則枯三江五湖
未易道也然隨其境之所遇距海止百里羣川衆流演
迤環會或奔焉如駛或汨焉如注或坎焉如竇或停焉

如潛以之分溢灑枯鍾美流惡無所不可故吾州號山水窟非虛語也惟天台仙居二溪併合於州西二十里之外秋潦至或有齧堤蕩郭之憂然自慶元中有之今則晏如也

州

州河在城中按舊經源始平橋平橋始石佛寺後山流於括蒼門後頗堙塞自括蒼門衍於州南橋東北流至東橋並栖霞宮又東北流越悟真橋觀橋䟽

而為二一南流至都酒務後凡白塔橋尼巷之水
皆入焉又東則入楊柳巷出寶城巷水門一東流
直出都米倉前稍南復東出崇和門水門餘水南
流亦會於寶城巷自餘甍率六通一帶之水又出
小固山水門大抵地勢西仰東卑故河流亦如之
昔傳河之名有三曰清漣曰新澤曰清水今皆污
壤通洧流而已先是城中水多壅塞自括蒼門䟽
而之東南由東北豐衍倉東南上崇和門水竇又

東越酒務又東匯於崇和門以池積水號廣惠渠
自錢氏歸版圖堙為平陸每霖雨則內水淹沮值
潮溢迸城飄蕩相望元守絳始開鑿通舟建十石
梁以度車馬馬又天禧中通判辛若濟以州泉汚
洄郡釀尤不給乃自東北山流瀑斷石為漕注入
天慶觀西南為一圓井又三百六十步為一方池
自池一百四十三步以達於務人賴其用號辛渠
且歌之

歌曰辛渠之水源十里其易若何如臂
使指潞亦不汚旱亦不止職方有圖千齡

萬
禊歲久梁廢池亦堙獨石槽畧有存者若廣惠渠

故跡既泯而元守鑿以通舟之處亦以居人櫛比

闕而小之今不惟舟不得通而車馬之路亦轉側

無所容矣

又按唐許渾有陪鄭使君泛舟晚歸詩云南郭望歸處郡樓高捲簾平橋低皂

蓋曲崖轉丹檐如此則郡通舟揖唐時已然元公增鑿之爾

狀元塘在州東一里舊為普濟院陳侍郎公輔居其西

馬時陳尚布衣忽有客以謁入語其父曰此寺為

池當有擢上第者人未之信寺僧後以地汚下徙

於州東北未幾竟為池政和二年陳果魁辟雍遂
以名其塘云

三台泉井一在宣詔亭左為上台一在司法廳右為中
台一在知錄廳左為下台歲久惟中下二泉僅存
上泉無知者嘉定四年黃守營物色得之乃亭其
上且親題扁額云

龍井在巾子山西麓舊傳龍伏於此常有雲氣騰空後
建浮圖鎮之而止

玉泉在白雲山下

楊傑題云白雲山下泉幾年石中韞
但見玉色明孰能究源本黃卦題

云水性能方負泉色常珪壁雲山靜有輝瓊液來
無迹泉上修禪人曹溪分一滴鑑止更澄源紛紛
萬緣息張景修題云長疑數尺玉乃是一方泉
粉色和雲汲茶香帶石煎鑑來誠美矣聞處合鑿
然白首惠山客
也須吟此篇

丹井泉在天慶觀昊天殿後舊傳茅盈鍊丹於此尤守

袞昊天殿記有云厥初茅君上飛仙靈蹤淠淠丹

井泉蓋指此也

佛泉在義靈廟山巔泓水澄潔源出石罅雖大旱不竭

以巖上刻佛字故名

蒙泉在崇壽寺後取山下出泉蒙之義郡嘗汲此水釀酒且以為名

臨海

靈江在州城外其水自三江合流環遶郭郭舊傳有赤城地靈江水丹丘井之謠又延慶院記云濟靈江而西蓋指此也中有一所名陳婆坳泓水極清巨潮澎湃不為動州舊以此水釀酒焉

嘉定中嘗以靈江風月名

郡醞

自朝天門外而渡則曰西江自興善門外而渡

則曰南江自靖越門外而渡則曰東江其實一水

也

俗號上中
下三渡

三江在縣西一十里源自天台關嶺仙居永安二溪至此與江合蓋三水所聚故曰三江然其流中分溪清而江濁

百步溪在縣西北六十里前後二灘石險湍激俗號大小惡舟者病之唐孟浩然尋天台山詩所謂欲尋

華頂去不憚惡溪名是也淳熙中令陳居安命工
泮鑿始無患

虎溪在縣東六十五里東掖山舊傳獻穆公主有目眚
僧法腴洗以呪水而愈奏置十八賢座倣廬山遠
公故以為名且名其泉曰大悲云

寨溪一名板沸溪在縣東七十里舊傳唐末有寇難遣
方將軍者駐兵於此側有地曰大郭營蓋其舊號
有鐵杵臼尚存

灘溪在縣南四十里接三十六渡東連南奧西入潮滌
或名紅溪以宣和間勦寇流血而名

潮滌溪在縣東四十三里自縣界四十里下流至大田
港入江

赤頰溪在縣西南四十九里源出赤頰潭至曷浦口入
江

仙人溪在縣西北六十里入江以其側有仙人輿故名
玉溪在縣西一十里浮岡俗稱朱師溪

小溪在縣西二十里源自清潭溪東注於江

磨頭溪在縣西北二十六里下流入太平鄉

油溪在縣南三十里受新嶺瑞巖嶺二水

塘上溪在縣西北三十里接仙居溪

中沙溪在縣東三十五里接桐巖山

沙潭溪在縣西北三十九里經縣界入江

周家溪在縣東四十里接延壽鄉龍湫

東溪在縣東四十五里受東掖兩山之水

雲溪在縣東四十五里出大田港

銅溪在縣西北五十里以其水如銅色故名

長潭溪在縣西北五十五里接沙潭

黃肚溪在縣東七十里桐巖山下

小芝溪在縣東七十六里自大田港入江

金溪在縣東一百三十里以其流有金沙故名

柘溪在縣東二十二里

西溪在縣東四十五里

杜瀆在縣東一百八十里

禦海潭在縣西南二十四里上有瀑飛灑近十餘丈望之如曳練下注為潭流入永安江

娑竭潭在縣東南三十里紹聖中禱雨現金蛇

赤頰潭在縣西南五十里元祐二年禱雨有金龜之應
白龍潭在縣東北五里

戲龍潭在縣西一十五里流至烏雞浦入江

新現潭在縣西南一十五里

烏石潭在縣北一十五里

白鬚潭在縣東北二十五里

碧雲潭在縣西五十里

百丈潭在縣東南六十九里

白巖潭在縣東七十里

碧瀛潭在縣東一百二十里

淡水潭在縣東南一百三十里海中

桃枝潭在縣東南一百四十里海中

東湖在崇和門外三十步初為船塢水軍營蓋端拱二年
張守蔚所建也景祐中運使殺少連廢船塢歸溫明
二州嘉祐中徐守億徙水軍營入城熙寧四年錢守暄
始開為湖時方築石修城以水至漂溢故鑿湖以受衆水
且以其土隄城之東絕後患焉紹興二十年蕭守振載
加修闢乾道五年向守洵復披故道剏城闢斗門上覆
以亭又即故斗門築三閘以通江淳熙十一年江守乙
祖亦復修焉度其地凡一萬六千步中有堂曰共樂堂

之前有亭曰流盃皆址於湖心

錢守所立

水光山色涵映

虛曠為春夏行樂之冠慶元三年劉守坦之易名知

樂人止稱共樂也

通判張翥詩云解慍薰風拂面涼藕花極目送清香三千宮女青羅

蓋都作酩酊酒輦粧又云蜀錦誰將到海涯水仙鋪作地行衣回堤却是元宵路拋擲紅燈戴月歸錢

守暄題共樂堂云疏就湖山秀氣濃花林茂列景爭雄管絃交奏客惟合臺榭競澄人喜同環障驚行飛

早晚平波魚陣躍西東荒蕪芟去成佳致換得汀州月與風汪泌題云臨海城東湖氣象清且奇無風

綠色淨十頃澄瑠璃中有共樂堂今其名者誰人有答我問大守下車時訪民所疾苦民曰水最危其水

或暴至城壞民流屍公謀得上策疊石全城基纔遺數百家室屋鱗參差水至無所障適與晚潮期又欲

隄其東苦乏土石資開湖足取用隄勢橫虹霓湖光
占空濶物從鑑中窺紫翠前後山環列如屏帷結堂
就虛曠與俗同游嬉太守宴堂上遊人歌水湄歌云
從公來除患補瘡痍況有此壯觀不樂何以為有如
登春臺人心舉熙熙從事能文者作辭書之碑庶其
不朽功上徹堯軒墀 柳安道題云平波數頃萬峯

前一片丹青畫不全幽榭小橋橫翠水茂林脩竹鎖
輕烟綺羅絃管追惟地雪月風花爛醉天爭奈及瓜
歸艸去湖山無復苦留連 姚舜諧題云秀氣清陰

日滿前仙瀛蓬閣景都全綵舟畫楫魚噴浪綺席金
爐麝吐烟懽勝更思明月夜飲酣惟恐夕陽天主人
報政榮途近淮浙重遊路接連 曾守宏父懷洪迄

題云東湖徑仄半蒼苔問訊紅蕖幾許開渺渺波光
侵坐席霏霏荷氣著尊罍片雲正為詩情起小雨更

將涼意來別來朝來知健否頗思劇飲拘蓮臺 又
題東湖云三年領客醉東湖欲去猶携竹裏厨誰解

挽留狂太守風
荷十頃翠相扶

小鑑湖在東湖北乾道中賀叅政允中建時公罷政寓
此以唐賀知章嘗請鑑湖一曲故以為名有占春
堂枕流漱石二亭今廢

破石湖在縣西三里故老云破石為湖故名側有巨石
及古塔僧禪鑑嘗卓庵焉

高湖在縣南九里近江吳太常卿高公察置

溪口湖在縣東南一百三十五里源出碧瀛溪

欣湖在縣東一十五里

仁湖在縣東七十里

章安湖在縣東南一百二十五里

闕塘在縣南一十五里

闕塘在縣東北一百八十里

交塘在縣東一百九十里

呪水井在縣東七里驛路傍元符中僧法腴誦觀音呪

水湧井以療疾輒愈

羅提刑適為之記

井上為屋奉觀

音像云

黃古井在縣東南一里舊傳有黃其姓者浚之故名

義井在縣西北五里威神院側乾隆四年僧守聚浚之
鶴井在縣東一百二十里杜瀆監側舊傳鶴舞其上故
名

九井在縣東南七十里石新婦廟前

忠孝泉在縣東四里父老云錢忠懿王以城闔罕水命
僧德韶行視鑿焉泉清冽且甘久旱不涸城內外

飽其潤故以忠孝名之舊傳巾子山二塔常歌側
自鑿此泉即正隆興初令徐讜初亭立碑

康濟泉在靈康廟後之西乾道三年令顏度禱晴於廟

見寢殿前堦水津津溢地穴之得泉故名

度有詩云三年

官事渾無補一片深心徹底真惟
有靈康是知己新泉為我現津津

菊泉在縣南二里

珍珠泉在縣西北二十八里穴二十有一其水甘香滾

滾如珠

瀑布泉在縣北五里白龍潭上垂流千丈宛如白練章
守得象詩所謂千尋練掛雙流瀑是也

湖苔泉在縣南二十五里穴三十有六源出古塘門溉

田甚衆

碧泉在縣西北一十三里壽安院

靈濟泉在縣東南二十五里靈康廟後之東

甘泉在縣東南四十里澄靈院側

木馬泉在縣東四十五里與吳承有堰通

赤城志卷二十三

欽定四庫全書

赤城志卷二十四

宋 陳耆卿 撰

山水門六

水

黃巖

永寧江源出縣西北三百四十里按舊志有大小二源
大源出塵山東南流廣一十五里二百一十里至
左溪村小源出黃巖山東北流廣五步一百里至

大溪與大源合然平淺不通舟又東流三十里至
官輿村無灘磧直下永寧江廣逾百步又東流一
百里從縣北過三十五里會臨海縣海口入於海
從源至海水程四百八十里寰宇記稱東山北臨

永寧江謝靈運嘗登焉

運靈有望海詩云開春猷
初歲白日出悠悠蕩志將

愉樂瞰海庶忘憂策馬步蘭皋縹緲息椒丘採蕙
遵大薄寒若履長洲白華縞陽林紫翹暱春流非
徒不弭忘覽物情彌適萱蘇始無慰寂寞終可求
陳與義詩云宴坐風前衝雨急黃巖縣裏借舟
遲百年癡點不相補萬事悲懼豈可期莽莽滄波
兼宿露紛紛白鷺落山陂只應江海淒涼地欠我

臨風一
賦詩

縣河在縣郭由官河東出支而為流者五深廣眎官河

出慶善坊者

舊大寺巷

至寺門而斷出叢桂坊者半民

居而斷出孝行坊者踰華嚴閣西而斷出奎文坊

者則入前洋而西達於浦惟出景賢坊者處五河

之中過錢家橋而北直邡家橋永寧橋分為別流

西匯於城隍祠下則經於縣治之前又北抵於壽

寧坊則經於縣治之後復南流與縣前河接環抱

縣圃西會於洪家巷以達於江

官河在縣東南一里自南浮橋南流至嶠嶺一百三十里陸程九十里廣一百五十步又別為九河各二十里支為九百三十六涇以丈記者七十五萬分為二百餘埭其名不可殫紀綿亘靈山馴雉飛鳧繁昌太平仁風三童永寧八鄉溉田七十一萬有奇舊建閘一十有一以時啓閉其隸仁風者曰常豐清混斗門隸飛鳧者曰交龍隸靈山者曰鮑家

步長浦隸繁昌者曰周洋回浦永豐黃望金青其
區畫之詳昉於元祐中羅提刑適廣於淳熙中勾
提舉昌恭既而李謙李大性踵將使指又重修焉
役大費鉅至煩朝廷撥封樁降度牒以附益之規

模閱遠矣

彭殿撰椿
年為之記

黃巖溪在縣西一百里源出黃巖山前所謂小源者也

其濱有黃石五區如相拱揖云

孫應時詩云得雨
溪聲壯終風雲氣

多山花依翠竹灘石亂寒莎樵父谷中出
牧兒牛背歌逢人問塵世擾擾意如何

三童溪在縣西南三十里源出三童山東流一十八里
入永寧江

日溪在縣西六十里古號新城西北有小谷曰金玉彎
橫溪在縣南九十里

白龍潭在縣東一十里方巖其穴有三大僅如甕常有
雲氣罩之居人見龍出入因其色白故以名潭嘉
祐初禱雨未驗夜分有大呼於野者曰龍已居西
矣旦以䟽投西潭一蛇躍出烈日飛雪繼之以雨

歲大稔

白塔潭在縣南四十五里土人常見龍出入舊傳潭在山頂廣不盈尺牧童續蔓墜石累十數莫能測俄大雷雨羣兒驚走翌日過之已失潭所矣嘉定十一年里人禱之巖鏵水流如線忽有小鼈從旁竅出盛之以歸既而大雨

方山潭在縣南一十七里一名金鵝俗傳舊在吉塢山有金鵝自潭飛出逾五里止於方山隅竟夕風雨

雷震旦視則為湫矣

霧露潭在縣東南二十里下有泓水深僅尺許每欲雨則雲氣直升或如靄霧紛凝則數日方雨

雙魚潭在縣西南三十里砂步佛嶺俗傳有雙魚各尺餘金色從溪逆上漁人網之不得竟入石巖下有一小坑湧水成潭每禱輒應

湖師潭在縣南三十里舊傳有巫家女嘗浣紗溪上為龍捲去其屍久不出後有漁人云見一女乘龍自

南海升天遂以名潭每欲雨則有雲霧

畫潭在縣西五十里山如餅爐潭居底旁無通蹊將詣潭必從上而下嘉定八年不雨權令陳達將投鐵簡而雷發潭中有五色雲出焉俄大風雨

赤頰潭在縣西五十里亂山中龍出入必大風雨故近山無居人旁有大木皆無膚葉父老言有龍黑身而赤頰遂以名潭

晉源潭在縣南八十里百丈巖側相距一澗水常洶湧

中有巨石如斗欲詣潭則俯循牛背以度歲旱致
禱或雷聲發於潭底則大雨隨之

柵眉潭在縣西九十里栢都洞南恠石壁立過者悚慄
年豐則有雲氣覆其上雖炎日中不散歟則否

三井潭在縣南九十里穴恠石上龍出入則雲氣翕然
又縣西北一十五里地名錢本坑下有井如品字
亦號三井潭

藏雪潭在縣西北一十里即鳴山之鳴川潭舊傳五六

月間積雪不消遂更今名

米篩浪潭在縣西五十里四面多恠巖雖無風而水常有浪如米篩紋云

聖巖潭在縣西六十里日溪側有瀑布自北山注潭中上有石可宴坐

靈龜潭在縣西六十五里

求仲弓詩云江湖雖濶多罾網幽澗清虛且勉旃待我功

成買雙鶴歸來
伴汝一十年

樓崎潭在縣南七十里每欲雨則雲遶半山土人謂樓

崎尖褱帽云

寒坑潭在縣西一百三十里兩崖夾山為澗時有黑風

自潭出每禱乘木筏以入微不謹則有驚怪

靈巖潭在縣北一十里靈巖下

戚五娘潭在縣西北一十里

橫山潭在縣西北一十五里

岱石潭在縣西南一十七里石大人山側

望海尖潭在縣西三里靈石山北巔

夏烏潭在縣西南六十里夏烏山側

圓巖潭在縣東南一百二十里松門山

天賜湖在縣東南五十里阻浪山水極清泚歲旱溉
田千頃故老相傳以為不假浚鑿天實賜之

橫湖在縣東南八十里百丈巖下凡東南溪流三十有
六皆會焉

消湖在縣東南九十里五龍山北

溪口湖在縣南一百一十里源出王城山東北流入浦

焚池在縣南三里中有石塔泉與鉄米篩井通僧淨真溝之入市今塞矣

大澤塘在縣西北四十里瑞巖山上僧慈保即一大壑為之下築石上築以土旁為十門分數道以達於

田

錢叅政端禮題云塵纓久欲濯滄浪今日來遊大澤塘水似我心心似水更無一事可商量

石井在縣西九十里栢都洞下上有石穴如舊圓而深雖刊鑿之巧不如也水自山流注旱澇如一日

牧童續蔓墜石探之莫測其深有木葉墮其中旋

自其南龍湫流出意其下相通云

常樂寺井在佛殿前大旱不枯慶元二年大雨溪溢水及寺半壁忽於井處作大盤渦撮水入焉須臾見平地

鐵米篩井在縣東三里九峰寺南源自山出其行如溝入井處僧以鐵窓限之故名米篩邑人皆汲焉令常濬孫榜曰不竭泉且亭其上

魯神井有三在縣東五里魯神廟側一在神像下不可汲

二在廟後回環皆巨木葉墜獨不入井中人以為異

委羽井在縣南五里洞南百步深不二尺旱澇不損益其味甘尤宜釀酒

甘露井在縣西八十里浮山寺舊傳有西僧講仁王經而甘露降故名泉宜造茶

古漩井在縣南三十五里平陸中

鎮頭山井在縣東南五十五里清可見底味甘

水簾在縣東八里箕巖側派流甚廣以其飛瀉如簾故名

滴水灣在縣北一十里自馬鞍山滴水成灣甘潔可愛
東監水在縣東南五十里自監山東流一十里僅勝十
石舟又一十五里入官河

水眼在縣東南五十里泥臭山下廣僅如盆深不滿三
尺大旱時隨汲隨滿人頗異

滴滴泉在縣西北四十里瑞巖舊傳有如意道人者居

之嘗絕糧神氣不減庵前有泉泓潔可愛令王然
作頌有庵前滴滴泓泉水流出心源嗣祖風之句
遂取以名

智者泉在明覺院非溪非井但於叢林根有小竅插以
筠筒引至石槽晝夜點滴不絕上槽既溢流及下
槽其水僅供緇流一日之用無餘無欠

天台

大溪在縣西南五十步源出婺州東陽縣以其受始豐

天台桐栢之水故名順流而下凡一百一十七里
至州

始豐溪在縣西南百步源出大盆山東溪一百八十里
與天台桐栢二水合始入大溪

青溪在縣西五里源出天台山南流至桐栢又南流三
里經三井下流為瀑布方南入大溪按謝靈運登
臨海嶠詩云旦發青溪陰唐玄宗送司馬承禎
詩云青溪祖逸人皆作青字俗呼為清者誤

檣溪在縣東二十里孫綽賦所謂濟檣溪而直進是也
杜甫詩亦云飢拾檣溪橡徐靈府記注云檣溪源
出華頂從鳳凰山東南流入溪則得名舊矣或又
名歡溪齊顧歡嘗居焉

靈溪在縣西北一十五里福聖觀前孫綽賦所謂瀑布
飛流以界道過靈溪而一濯是也今縣東二十里
亦有靈溪蓋其名適類云

乾溪在縣南一十五里舊傳僧曇猷訪赤城有一媼與

之語神怒投媪於淵猷飛錫救之其溪立涸故以
為名

神迹溪在縣東北五里與國清溪共流至神迹廟分支
一入臨川橋一入孝義橋

左溪在縣西三十里壽昌路上與關嶺接委蛇曲折凡
七十里至大溪

福溪在縣北四十里按晉束皙啟蒙記注天台山去人
不遠路經福溪水險而清蓋是時已有此名矣

折溪在縣東北五里舊經作浙溪

國清溪在縣西北一十里流九里入大溪

玉女溪在縣西北二十五里桐栢觀前

界溪在縣東四十里一名介溪

羅木溪在縣北六十里羅公嶺東南

水母溪在縣北一百里摘星嶺南

赤城溪在縣西北五里入大溪

南嶼溪在縣西北七里

響山溪在縣東一十五里

幽溪在縣東北二十里淨明院前

關嶺溪在縣西四十里

惠濟潭在石梁下嘉泰初禱雨現異黿四年夏雷雨涌

出金銀藏錢圓徑六寸餘文曰太平通寶實太宗
朝賜以鎮潭者側有佇真亭

百丈潭在瓊臺雙闕間翠蔓蒙絡水聲滾然盤澗繞麓
入為雲溪云

靈澤潭在縣東四十里舊名蒼山三潭列其下深廣瑩徹其龍最靈嘉泰元年禱雨現異蛇

石蟬潭在縣東五十里小溪亂石中水深無底其靈眎

靈澤潭

金橋潭在縣西北一十五里水清徹可鑒旱澇不損益
深坑潭在縣南二十五里筋竹嶺側

瀑布潭在縣西南三十五里無相院側一名戲龍

河肩潭在縣西七十里下上雲雨土人敬事之

雷馬潭在縣西九十里雷馬山上

臭山潭在縣西一十五里

莫婆潭在縣北一十五里

丹霞潭在縣西北二十里

翠屏潭在縣南三十里

泉湖在縣西五十里

茅君傳云霍林司命治赤城玉洞之府齊永明中忽有羣鵠從西北

來下集霍門溪谷填塞彌蔓數里多所踰藉狀如為物所驚一夕退飛向西北去殆是赤城上都泉

湖中物也

始豐湖在縣南四十步今為大溪水衝壞併為一矣

降真塘在縣北二十里徐靈府記云桐栢觀前一里石
壇前有塘名降真中植荷荇今自塘一里出洞門
西峯即王真君壇也

三井在縣北二十里昭慶院東唐時嘗遣使投金龍白
壁舊傳為尼所觸一井自塞其二深不可測每春
夏時雨則衆流灌注激湧雷吼或云通海又云海
眼李郢詩所謂三井應潮通海浪是也咸平中醮

祭投龍

夏英公疎銘云石罅山半三井如鑿員不可規深不可度亂澗四入飛流外落墜石

不盈驕陽不潤冷激松檜碧泥崖崿山靈所衛神物攸托簫鼓一鳴雷雨偕作

湧泉在縣西一十五里

巖泉在縣北六十里

龍鬚泉在縣西七十里龍鬚洞口以其噴薄如龍鬚之

布故名

赤城志卷二十四

欽定四庫全書

赤城志卷二十五

宋 陳耆卿 撰

山水門七

水

仙居

永安溪在縣西二百一十里大小二源小源出馮師山
東流一百六里至曹村淺不可舟自曹村而下廣
二十步勝小艇又東至妃姑與大源會廣二十步

又東流六十七里而南勝二十石舟

曹溪在縣西九十里源出括蒼嶺南流四十里入大溪
嶺上有潭曰曹潭淳熙十四年令蘇光庭禱雨忽
有物蜿蜒而出一黑一黃以磬承之躍而入遂迎
止於潭下翌日大雨先是光庭夢有曹其姓者手
二小龍而至及是符其夢問潭何名則曰曹遂築
室以祠

櫟溪在縣西二十里源出處婺溫三州流至同蓼溪入

大溪

孟大武詩云樵斧斫雲春谷暗
漁柳敲月夜溪寒人甚稱之

杜蜀溪在縣南二十里蜀王廟前頗窈險俗號杜濁按
廟記當為蜀也

彭溪在縣東二十里源出天台南流一百一十里入大
溪

蓼溪在縣西二十里源出永嘉杉崗北流一百十里入
大溪

南溪在縣西南二十九里源出永嘉杉崗北流五十里

入大溪

白水溪在縣東北四十里源出天台竹山溪南流一百十五里入大溪

班溪在縣東五十八里源出天台縣竹山溪東流五十里入大溪

馬嶺溪在縣西六十里源出東陽南流三十里入大溪
柘溪在縣西六十里源出馬嶺東流三十里入大溪
瞿溪在縣西七十里源出東陽南流三十里入大溪

土瀆溪在縣西八十里源出紫巖山北流五十里入大溪

石井溪在縣西一百四里源出東陽南流一百二十里入大溪

朱溪在縣西一百六里一名木溪源出括蒼嶺南流四十里入瞿溪十里入大溪

哈裏溪在縣西一百六里源出括蒼嶺南流三十里入大溪

左溪在縣西一百七十里源出永嘉杉崗北流四十里入大溪

真溪在縣西一百七十四里源出馮師山東流四十三里入大溪

方溪在縣東一百七十八里源出永嘉北流一百二十里入大溪

慈溪在縣西一百八十里源出括蒼嶺南流四十里入大溪

孟溪山潭五曰老公潭在縣北二十里曰山王潭在縣
北二十五里曰孟碗潭在縣北三十五里曰馬篠
潭在縣北三十里曰桂坑潭在縣北三十里按舊
經馬篠即石藤石稜二夫人溺死處皇祐中令陳
襄禱雨立應

陳有報雨詩二十韻有靈泉汲坎窞
仙仗下嶙峋雷斧潛噴樹天波忽灑

塵之
句

柘溪潭在縣西北三十里近張阜山中有古湫名廣潭
泓深特甚前橫石檻廣三丈許脩四丈有奇有石

室可容百人巖貯聖僧像且有石虎石馬之類又有大古藤一根故老云嘗有青蛇繞護或斧之則流血焉下又有三湫湫外有泓水亦隨潮盈縮每翕乾則有雨居人常以為候云

張阜潭在縣西北三十里山上其深峻處有石潭垂崖飛瀑林木森然至者神竦後以岨石摧墮龍不潛伏歟於山嶺洞側湧一砂潭每水清則見長鮪焉會乞水必自石潭以次而升夜憇潭側旦則迎水

而去每潮長則砂潭之波浸沒沙石潮退復平皆
云龍之潛升以時變化蓋如此

彭溪潭在縣北四十里支派疏為四堰所溉田甚衆其
旁脩竹十頃民採擷以供衣食焉其後豪民奄據
剪耨幾盡淳熙十四年因作新廟遂嚴樵牧之禁
云

三井潭在縣東北三十里

菴源潭在縣西南四十里

天井潭在縣東六十里

馬鞍山潭在縣東六十里

左溪右溪潭在縣西南九十里韋羌深處

蒼山潭在縣東南一百里

深澄湖在縣東一十五里相傳開禧初有漁於此者見

巨魚長可二三丈因以物撻之獲一鱗如盃自後

出沒不常或以為龍宅云

相湖在縣東一十五里水四時不涸嘗於網中得石刻

有相湖二字今尚存

虬湖在縣東一十五里以其水灣曲如虬故名今廢

黃赤湖在縣東南二十里脩廣皆數丈水四時如沸夏
飲毛骨凜凜冬飲則如湯故老云皇祐中嘗有龍
出沒云

小西湖在縣西二十里吳給事弼所剏延袤數里傍有
亭館凡十數

磬湖在縣東南二十五里父老云常有磬浮水上光采

奪目故名

赤湖在縣西七十里其初煙水極目有赤眼巨魚長丈餘游泳其中今不復存湖亦半為田矣

導湖在縣東二十七里

蔡經井有九在縣東一十七里舊傳每汲其一八皆波動兵火後存其五爾

瑤崩瀑在縣西五十里玉几山北源出項羽山流為二潭潭之下巖三面壁立端截深峭可環以坐瀑緣

壁而下或雨初霽則飛流濺沫廣至十丈餘蓋奇觀也

民天泉在縣南三里

寧海

淮河源在縣東一百步桃源橋北經桐山羅坑湊黃塢三十里入海周顥德三年令祖孝傑用水工黃允德言謂縣北地坦夷宜鑿渠通海引舟入梁以通百貨遂葉田七頃發民丁六萬浚之既而渠成視

其勢反卑於縣雖距海一舍而為堰者九重以兩山水暴漲蓄蕩堰閘遂止不浚時歲飢且寒役人多死或云今縣北千人坑蓋其時叢塚也元祐六年羅提刑適重浚之亦無成今故道存焉

廣度河在縣治外繞城如帶俗名玉帶水云

大溪在縣西四十里源出桃花坑牛頭潭等處舊自草湖並山東行距邑頗遠元祐中羅提刑適檄縣室之頗䟽鑿使近邑今去溪無半里民以為便

夷吳溪在縣西一十里源出靈公馬輿風廬等處東入海

白渚溪在縣北一十五里源出白嶠山流三十五里入

鄞縣

馬紫溪在縣北二十里源出白嶠山東北流入港

湖瀆溪在縣西南三十五里源出天台石橋等處流至

雙港渡入海

上白溪在縣南四十五里俗呼孤囁溪源出天台華頂

東北流八十里入餘魚溪又東流三十里入海

小鼈溪在縣南四十五里源出桐栢山東流二十里入

海

東溪在縣南七十五里源出屈母山西北三十里入寧

和溪

寧和溪在縣南九十里源出天台及屈母山北流四十

里又東流一十里入海

車溪在縣南九十里彌望皆細沙出鐵屑冶者陶鍊

成之

西溪在縣西北三十里

海游溪在縣南四十里東流五十里入海

峽溪在縣北六十里

柴溪在縣東北八十里

湫水潭三在縣東南一百里一名玉溪舊傳吳尚書屈

晃生子坦坦偕其母隱於此尋化為龍母亦尸解

葬其處世所謂龍母山也隋開皇九年僧智顗自

建鄴至薄暮覩一大厦莫知何所扣戶有老嫗出
迎顓已悟為龍遂託宿焉嫗云師遠來何以幸教
遂為鋪說且戒曰旱宜施雨嫗受令惟謹翌日顓
去回視其處已成湫矣按州城隍廟記既指為屈
坦今又以坦為湫水龍則是一人而主二祠豈神
之變化固無方耶

乾道四年加封城隍誥詞云至
今台嶺之人想見玉溪之蹟與

毋俱隱既著一時之令名於
民有功宜膺千載之命祀云

白龍潭在縣西二十五里其上崇巖插空雲氣瀕洞世

傳龍與茶山會見鱗甲澡瑩如玉雪然有一媼廬其前能以草木向背睭龍出入其靈跡甚異

梁源潭在縣西三十里梁王山西蹬棧險絕人跡罕到

嘉定四年早令趙善鏐因謁梁祠讀古碑遂訪求

得之方致禱雷發兩崖雨如注

石上有題名不書姓氏但云述同緯

謁蓋紹聖丙子令高述禱雨而書也緯不知為誰父老傳述禱此時亦曾有龍見

驢潭在縣西北四十里龍鬚山上有蛟時出其首如驢故以為名山中崖石奇恠且多竅穴相傳鬼神出

沒其間

松巖潭三在縣西北七十里上潭險絕無逕中潭名煎

茶每禱則淪茗焉有瀑布瀉其下水清淺遊魚可

數下潭圓徑三丈許上隘內寬水紺

闕

知淺深

乾道中禱雨僧墜鉞其中善水者沒而取之見其
下若大堂第晃潔可愛有龍枕石卧忽驤其首沒
者驚亟出俄而兩崖間水湧大餘甘澍大洽焉

茶山黑龍潭三在縣北一百二十里其水三色中潭圓

如井上有飛瀑瀉其下崖谷詰屈如三葉屏風上
潭幾不可登

蘇思潭在縣西北一百二十里上有大木如屈蓋然每
禱祈文書不如式即浮出或許雨則現燭光隱隱
若蓮華山多虎豹蛇虺之屬

規城坑潭在縣東南一百三十里凡旱禱必飯粟羹鱸
以祭得龜魚即雨又有雙峰潭同在其處皆號險
怪云

主簿潭在縣西二里崇教寺嶺下舊傳有一主簿出游以馬躍溺死不知其所在後能顯異出雲雨今半堙塞矣

石合潭在縣西一十里形如大石合故名凡禱雨送水必會於此

石洩潭在縣東南三十里圓崖上有一穴徑數丈水清且深

青雷潭在縣西北五十里其上一峯圓聳古木鬱蟠樵

者至必有蛇逐之每乞雨則得金鰻云

徐家潭在縣東北九十里接蓋蒼山每亢旱禱之輒有雲氣蜿蜒如帶已而大雨

大澤潭在縣西南一百里大龍山上紹聖三年令高述禱雨嘗刻讚焉

石婆輿潭在縣東北六里

石門潭在縣北二十里源出剡中深不可測

帽尖山潭在縣東北三十里

視潭在縣西三十里梁王山東

白龍山潭在縣東四十里

大雪潭在縣西北八十里

方石潭在縣西北八十里

石龍竇在縣西北七十里龍公嶼竇在石壁下世傳龍

於此出入其展轉挨擦處猶有痕焉下為大湫不知源所從來但見竇水瀉下噴激如飛練崖上有

石龍竇三字

孝女湖在縣西三十里平野中有山特立名塔山山之麓有湖舊傳唐時有汪氏女苦節不嫁勸織以奉其親親好湖水其家距湖五里女日汲以供之親沒建塔報焉人遂以此名湖與山凡大旱取之不竭

青鏡湖在縣東南二里

草湖在縣西南一十里

九頃塘在縣西四十里包山吞麓其浸九頃歲產菡萏

則旱生菱芡則豐土人候之甚驗有金銀鯽魚味絕美然有魚艇則覆焉其神異多此類

薛公井在縣東北九十步廣度坊側隆興二年令薛抗重建且亭其上按此至東驛凡八井位按比辰之次特廣且深自薛闔端餘次第甃治邑人蒙賴故以其姓名之其後井堦亭廢嘉定十六年齊守碩浚井復亭且為之記云

市西井在縣西六十步名透瓶泉暑月以銀鐵等器汲

之皆沁出寒冽特甚

後郭井在縣西九十七步淳熙十三年邑人蕭氏女重

修

妙相寺前井在縣東一百一十六步

晟家街井在縣北一百七十步

桃源橋井在縣東一百八十步

方家井在縣東二百步

東驛井在縣東一百一十五步初鑿時於地中得石刻

云下有石骨接天燒水旱如一隆興二年主簿黃
樸斲治之

新泉井在縣學講堂前紹熙五年因有泉溢出令李知
微浚之

石井在縣西北五十里閭風臺上

石井在縣西北八十里崖上近石龍竇圓廣丈餘深不
可測下有石鑊圍一丈深四尺許其凹窪處正如
鑊然蓋溪水所經也或有石墜井歲月磨蕩盡為

圓石以出今邑人多有之

麻源水廉在縣西七十里
有洞深廣坐可十數人
瀑水緣崖而下日照如水晶
簾盛夏有寒氣

冷水泓在縣西五里
旱不枯涸夏冽而冬溫

尾閭在縣東海中與海門馬筋相直
惟高山可望其水湍急
陷為大渦者十餘舟楫不敢近
舊傳為東海

泄水處

詳見夷堅志

鴈蒼瀑在縣西北四十里
大壑中雙崖壁立瀑從空飛

注石上聲出雷霆餘沫噴灑暑時暮秋旁多亂石
可坐上有龍井土人以綆測之深百六十尋沿磴
數丈有小石洞洞中石紋如龍鱗燿燿有光上有
石窓唐末有道士居之自言江州人嘗取松葉茯苓
以自給年百餘歲後不知所終

赤城志卷二十五

欽定四庫全書

赤城志卷二十六

宋 陳耆卿 撰

山水門八

遷書河渠固志溝洫得不以水利吾民之命不容不脩
錄之歟每念古鄭白之儔出意䟽鑿有以一渠而溉田
千頃者接於近世非惟不能圖新而併與其舊失之矣
台雖號山郡所在陂塘良衆顧以豪吞富噬日湮月磨
每歲邑丞彙申按敗紙占名惟謹何識興壞以故甫晴

虞旱方雨憂潦蓋人力不至而動責之天宜其少樂歲也余故搜按舊畝特揭一門庶使後之有志者可按圖而得之焉乃若溪派河流浸灌浩博蓋水利之大者前已詳故不重載

水利

臨海

大固鄉

周家堰

古涇湖梁埭

義誠鄉

高湖堰

保樂鄉

東山頭浦

謝奧浦

漚泄浦

松浦涇

廣濟埭浦涇

林子浦涇

吳志屋後浦涇

涂下浦涇

章安浦涇

遂仁鄉

長石廟前浦

洋輿堰

明化鄉

蛟龍涇

新窰家子浦涇

安樂鄉

道場碛

石牛碛

湧泉碛

胡超堰

下堰

吳丞有堰

重輝鄉

長潭堰

黃肚堰

中沙堰

馬銀泉

楊木泉

潘婆泉

長樂鄉

古涇埭

湧泉涇

黃巖

仁風鄉

步頭埭

石湫埭

西仙浦埭

三童鄉

興家埭

方家埭

孝順埭

鄭戍埭

林家埭

永寧鄉

楊家埭

善化鄉

淨土埭

新埭

飛鳧鄉

仙浦埭

水礪埭

斗門仙埭

章師埭

蛟龍埭

備禮鄉

塘浦

靖化鄉

壇頭等碕

自黃巖溪五十二水合為一溪東分為二十碕又東北始為壇頭碕白巖碕又

北東為鳥巖碕

板碕

靈山鄉

于浦

瀕於海為河涇宣泄之處

洋嶼埭

長浦埭

鮑家埭

凌家埭

陳伏埭

繁昌鄉

顏家埭

黃望埭

金青埭

葡萄棚二埭

監側小埭

細嶼埭

來遠鄉

陳家碇

下嶼碇

吳佛洋碇

李家埭

太平鄉

高浦大埭

鋪堆埭

高浦小埭

車輅大埭

臨清涇埭

西保埭

婁子埭

蔣家埭

月河埭

伍婆埭

牯牛埭

王三浦埭

流沙闕埭

天台

太平鄉

長塘

戴應塘

新塘

鮑家塘

山頭大塘

公塘

鮑磚塘

泉井塘

西安隱院庄前塘

明公碣

資福前寺碣

滑溪碣

奚亭碣

王家碣

杜礪

視礪

新官坊礪

黃壇礪

窠山礪

苓塘礪

新坊水圳

西洋水圳

永保鄉

桐栢天照塘

桐栢庄邊塘

萬年塔邊塘

桐栢伎石塘

官塘

護國塘二

蓮元塘

葛家塘

柿碕

筋竹碕

道士碕

巖頭碕

清口碕

又清口碕

白馬碕

楊樹碕

黃甚碕

周家碕

九女碕

乃居人周順九女
共成之發源甚遠

祥鸞鄉

牛頭塘

寧國寺前東塘

過路塘

徐家塘

王家上下塘

汪家塘

衆塘

石竹磑

岳磑

為一邑陂塘之最舊因居人岳其姓者開之故名今苗裔在焉

松山磑

谷溪磑

積石鄉

槎潭磑

岳磑

東求碕

下碕

大柘裏王碕

坑碕

單家碕

小坑碕

小溪畝碕

黃固畝碕

仙居

昇平鄉

張阜堰

溪上堰

孟溪石藤堰

上碕堰

了溪堰

慶雲鄉

彭溪坑堰

厚奢堰

開元鄉

圳口感德堰

玉潘道堰

祝塿堰

赭光堰

北山秋成堰

高遷雷垣堰

潘湖堰

赤城巖湖堰

蓼溪新堰

橫溪堰

張支湖堰

清風鄉

深梟堰

才塘堰

洋前堰

柵岸砂溪堰

板橋吳橫堰

湖村陳道堰

歸仁鄉

陽歸堰

遂寧鄉

童渠堰

上畝堰

木舟後洋堰

寧海

連理鄉

大溪礮

又大溪礮

黃壇礮

新村礮

蔣家礮

吳家礮

太尉堂前碑

金家澤坑碑

崇教寺嶺碑

吳阮大碑

古大碑

上畈古圳

朱開鄉

鍾家碑

莫家碑

東山頭坑碑

和尚塘碑

葉家輿碑

永康鄉

與子大塘

上白溪潛家步碑

中碑

下碑

下山碑

前王上碑

下村碑

坑口下田碑

竺家洪水碑

山王輿坑

仙巖鄉

黎家碑

上碑

下碑

湧溪四碑

毛二娘潭碣

烏隱碣

剡畝碣

石馬胡村碣

外洋碣

和尚碣

新寧鄉

倉頭碣

細零坑碣

五里河

白鶴殿厠

寧和鄉

聖前塘坑碣

東洋杏桃碣

東壁碑

管溪碑

前金碑

下任碑

嶺下碑

蔣家碑

塘泉水孔

赤城志卷二十六